



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**24. Kalenderwoche – ab 14. Juni 2009**

## **Bflischd erfilld!**

So, de erschde Wahl hammor vorschd Sonndach hinnor uns gebrachd. Obs nu werglisch de erschde Wahl gewähsn is, die mir gewähld hamm... - odor bloß zweede Wahl odor Ausschuss... ? - das wird sich erschd rausschdeln missn in de näschsdn Monadde un Jahre. Da kannsde jedzde bloß hoffn. Gewähld is gewähld! Das lāsds sich so schnell nisch widdor umändorn.

Jednfalls bin isch fiehrs erschde sähr erleischdord - isch hab mei demogradisches Reschd wahrgenommt! Isch hab mir bewiesn, das isch das kann, obwohl ich ja eischendlich dodahl undemogradisch offgewachsn bin. Nee, isch weeiß wie Demogradie gehen dud. Grob!

Un isch gloobe, isch hab daderbei - also, bei dor Wahl - ooch soweid alles rischdisch gemachd - mid meine Greize! Isch meene, du mussd ja deine Greize an dor rischdischn Schdelle machn. Wenn de deine Greize eenfach so bei den Zeddln an den Rand machen dusd odor so in de Mitte... sozusachn in dähn lufdlähren Raum... dann dud das ja dann nisch gilden. Deine Greize dun ja bloß dann gildn, wenn de se an de rischdische Schdelle gemachd hasd. Wo die Gringl sinn. Un dann kommds nadierhlich außordähm noch droffan, währ an so eener Schdelle schdehn dud. Welschor Name. Es is ja bei eenor Wahl nisch ganz vellisch egahl, währn de währn dusd. Nee, ganz egahl is das nisch. Grade bei dähr Gummunahlwahl nisch!

Isch darf mir gahr nisch vorschdeln, wenn alle die Larvn, die jedzde wochenlang mid ihre Gesischdor das Schdadtbild vorschandeld hamm... an jedor Laderne drei bis viere! – wenn die dann dauornd in dor Zeidung offdauchn dun dädn! Gleich off dor Diddlseide!

Off dor annorn Seide kenn die eim nadiehrlich ooch leid dun... wie die da so an de Ladern un annre Bfähle rumgehang ham... - da wird doch jede Laderne zum Mardorbfahl!

Jednfalls - wenn die dann hier vor deinor Nase ooch noch Endscheidungen fälln missn! Wenn das dann de Falschn sinn, da gehds dir ja direggd ans Gnie womeeschlich!

Ja, de Gummunahlwahl is de gefährlichsde! Da kann sisch, wensde falsch gewähld hasd, das direggd an Dir bersehnlich räschn! Un nisch bloß obdisch!

Wensde bei dor Eurobawahl falsch gewähld hasd... das is längsd nisch so gefährlich! Die sidzn ja dann weid genuch weg von dir - ehm in Brissl! Die siehsde nisch. Un was die dord fiehr Bleedsinn machn dun, das erfährsde dann besdnfalls aus dor Zeidung odor im Fernsähor.

Wobei dähr Bleedsinn in Brissl ooch ganz scheen deuor sein soll. Die sinn dord beim Geldvorwirschn nisch viel schleschdor als wie eene Landesbank. Ma zu schweischn von dähr „Rijell esstehd Bank“! Abor Brissl is ehm weid weg.

Bei dor Gummunahlbolledig hingesch n is das annersch. Die de gewähld hasd, die dun dann dir direggd vor dor Nase sidzn. Im Radhaus! Am Margd! Gleich nähm Fodo Gradzsch!

**Eduard Sachsenmeyer**